

芥子園畫傳

卷下

戊辰六臘

祖楹題



民國十六年
五月

每部定價實洋壹元陸角

蘇城臨頓路

毛上珍承印

光福志卷六

里人徐 傅編

人物

光福代有聞人且地僻湖山尤多隱逸惟是文獻無徵不敢謬採今就載籍中所見者錄之緣篇頁無多不復分門別類云

漢 朱買臣字翁子吳人家在穹窿山麓相傳拈華寺是其遺宅東嶺下有盤石相傳爲讀書臺嘗刈薪賣以自給擔薪行且誦其妻亦戴負相隨數止毋歌謳道中買臣益疾歌妻羞之求去買臣不能留後數歲買臣隨上計吏爲卒將車至長安詣闕上書久不報待詔公車會邑子嚴助貴幸薦買臣召見說春秋言楚詞帝甚悅之拜爲中大夫是時方築朔方公孫宏諫上使買臣難詘宏後買臣坐事免久之召待詔時東越數反覆買臣因言故東越王居保泉山一人守險千人不得上今聞更徙處南行去泉山五百里居大澤中

光

福志

卷六 人物

發兵直指泉山陳舟列兵席卷南行可破滅也上拜買臣會稽太守謂曰富貴不歸故鄉如衣錦夜行今子何如買臣頓首謝詔到郡治樓船備糧食具水戰歲餘受詔將兵與韓說等擊破東越有功徵入爲主爵都尉列于九卿張湯爲御史大夫行丞相事知買臣素貴故陵折之買臣見湯坐牀上弗爲禮買臣深怨嘗欲死之後遂告湯陰事湯自殺上亦誅買臣子山拊官至郡守稱能吏

宋 黃彥字脩中其先浦城人父挺字公操章得象薦爲吳縣尉家焉歷秀州司理餘杭尉筠州判官太子洗馬致仕與章帖等爲十老會累贈金紫光祿大夫熙寧中彥以王安石經說與弟頴俱第進士安石舉爲越州教授遷瀛州防禦推官知崇德縣長興丞以省罷知浦江縣清直明恕民畫像祠之紹聖中知虹縣有廟吏僞言井蛇爲水龍能愈疾彥以蛇磔死妖乃不興又麥秀兩歧蝗不入境時稱有古循吏風除楚州教授宗正寺簿改富陽令政如

前坐法免管勾嵩山崇福宮官至朝奉大夫致仕政和四年卒弟頴字升中官至朝議大夫

廬熊吳縣志策傳云黃氏自挺以下居聚塢迄今族聚焉

黃策字子虛彥子九歲能文元祐六年第進士方弱冠嘗追和梁昭明所選詩持見蘇軾軾曰子異時必以文顯歷雍邱主簿齊州教授元符末詔中外言事時昭慈聖獻皇后既復位號而典策有未盡正者乃引古誼上書甚切蔡京深銜之崇寧初黨籍羈管登州會赦還鄉後爲發運使屬官黜賣京家貲建炎中追錄黨人除直秘閣通判嚴州初欽宗在青宮時聞策名大書隨緣堂三字以賜因自號隨緣居士仕至工部侍郎子維維弟纓字端冕宣和未屢上書言事李綱爲行營使嘗居幕府遭亂還鄉陳長方稱爲千人之英紹興初以文名策有隨緣居士集四十卷纓有感事詩子季魯字道夫有集十卷皆附焉策弟簡字能甫黃氏自挺以下居聚塢山爲縣中大族至宋亡僅十餘世

縣志循良傳○中吳紀聞公無疾端坐而逝葬光福山自題其墓曰隨緣居士之塔

光

福

志

卷六 人物

一一

顧禧字景繁居光福山中其祖沂字歸聖終龔州太守父彥成字子美靖康中嘗將漕兩浙景繁雖受世賞讀書自娛自號漫莊又號癡絕嘗注蘇子美詩其他著述甚富所交皆一時名士鄱陽張子微以詩聞天下景繁結爲一社與之唱酬今張集有送景繁歸浙西詩云牆頭飛花如雪委牆根老柳絲垂地春正濃時君不留山路曉風鳴馬箠濤江入眼浪千尺相見吳儂問行李田園久荒漫檢校親舊相逢半悲喜行朝諸公訪人材故人新賜尙書履袖中有策則可陳君亦應行聊爾耳又他書稱譽景繁不一如云顧侯風味更嚴若家貧闕辦三韭菹龜腸撐突五千卷底用會萃箋蟲魚又云虎頭文字逼前輩袞袞顛蒙分尺素天閑老驥日千里何用鹽車追蹇步景繁隱居五十年享壽而終

中吳紀聞按邑志云博極墳典著述甚富與吳興施元之注蘇文忠公詩尤詳紹興間以遺逸薦遂隱居五十年不出築室邳村表曰漫莊

章憲字叔度其父都官郎中甫自建州徙居於蘇叔度居黃村樂道脩行以餘力學文鄉人稱爲君子與弟哲嘗受學玉蘋及與楊時朱辰呂木中游憲

尤邃於春秋宣和中謫漢陽軍酒稅沒於兵有復軒集曾文清幾序而傳之徐綦原籍汴梁子揆宣和中爲太學齋長當二帝蒙塵時肅王出使詔擇從官朝臣多畏難揆毅然應命上書金人不屈被害詔諡靖節綦避兵南下愛光福山水清嘉遂家焉世號汴河公此光福徐氏之始祖也

徐博字志溥綦四世孫幼聰慧性沈厚讀書過目成誦涉獵經史手自評論時當南宋末季見殘山剩水常悲歌擊節以未展其志爲恨嘉泰間以國學上舍授登仕郎年已五十餘而銓選京師又十餘年復得羸疾抵家而卒年六十九天性孝友自奉儉約宗族鄰里相睦相恤鄉黨稱爲有德者

徐曰綸字鳴遠號西谷靖節七世孫姿貌豐厚氣節剛方性端重有識慮常憤賈似道但知湖山之樂不計國事之艱德祐間詔辟岩穴之士士大夫薦於朝以知政體悉利弊擢吏科給事中後卽條陳國事日非紀綱叢脞須先下罪己之詔以安中外之心奏議侃侃忠憤形諸詩歌不三載而國已亡慟

哭誓以身殉以母老無依遂縞素避世終身不入城市元伯顏知其賢屢徵不出植梅數十株畜二鶴終日苦吟皆黍離麥秀之句嘗語人曰予不從陸秀夫文天祥同殉國難爲終身遺憾言輒涕下年六十八卒於元至元十一年蘇向論曰西谷不於季世而弗仕不於開國以希榮殆所謂全國全身者與

元 徐雷龍字幼成靖節 世孫宋瀉祐間名綴解榜授登仕郎穎悟夙成博學多識嘗從狀元阮登炳習舉子業爲時論所重有謂雷龍之論黃竹野之策劉浩然之賦爲虎溪三絕元初以達官薦授武進縣教諭不就屏居光福山以終

明 徐達佐字良夫靖節 世孫幼喪父母十六歲始習舉子業嘗從鄱陽邵宏道學易又受書於天台董仁仲得精義理不務文辭元季隱山中推田園於族人躬行孝悌延師家塾教族之子弟歲祭宴享會族衆於家講論詩書

禮樂升降揖讓之禮洪武己巳鄉人施仁知建甯府遣諸生以幣請爲其學訓導達佐以建甯爲朱子闕里卽往留二年教諸生如教其族人旋以疾卒於學舍嘗注顏孟四子書邑志儒林傳俞貞木達傳有詩文集六卷董遠字仁仲天台人精朱氏詩及左氏春秋至正中試有司不中遂留泉塘潛心古學無意科舉己入吳天平山中張士誠聞名書幣迎之堅臥不起使再及門乃避地錦峰吳元年徵赴京師以沈默不稱旨謫居濠梁八年用薦授莆田縣以循良稱年六十餘卒縣志流寓朱鷺字白民吳江人初名家棟少肄府學有俊才家貧授徒以養父母承顏順志以老萊子爲法牀頭恒貯數千錢曰買笑錢父死乃謝青衿芒鞋竹杖獨游名山所至畫竹以自給常入華嶽登天井黃縉道服見者皆以爲仙初好老氏學解道德參同之旨晚棄歸禪參雲樓憨山二老結茅蓮花峰下年八十逝

光

福

志

卷六

人物

四

徐衢字用莊少好學性務實不近名能孝養親有司知其賢每進之訪求民隱吏弊應對必公而條畫悉當若關譏之征租庸之鈔悉陳說利害惠賚商氓疏木瀆龍塘水道脩建閘門永濟橋及郡學范文正公祠皆賴董督工堅費約至福溪安福二橋圯而復成菱塘捍水長堤隕而復築直以己力爲之輕財赴義往往不倦知府賈爽特以賓禮延之里閭咸稱有道君子年踰六十卒邑志好義傳

徐倫字宗彛號葦軒靖節世孫生而穎悟爲人寬而莊卓然有先代風而

文采過之年二十四始游庠屢應舉不售遂絕意進取築室於東崦之濱曰葦軒有水竹花石之美中惟古鼎圖書之品翛然世外終日著書吟咏老猶不倦其文高簡俊拔詩則冲淡著有葦軒集十帙至凋窮振乏竭力爲之正統中歲飢人有輸穀以助官賑倫私貸於鄉殆無虛歲償不償不計也父存善得羸疾常在床褥倫籲天祈父延年願以身代侍奉湯藥三載無間生四

子曰禮義廉績一日忽扁戶爲遺命曰兄弟異產世俗通患爾輩恐不免因自將田宅器服及告誡之辭藏之巾笥踰數日而病乃授於子而卒年七十七時宏治己酉歲也論曰葦軒行義文雅足以高視一鄉言論丰采足以振聳羣輩抱才而不售秉志而不回洵稱爲古之隱君子也

顧聞字行之周山人也嘉靖中有聲公車間不第以死岳岱曰才華瑰麗鋪叙豐長究其所歸靡不有自至於染翰人稱並美子孟林字山甫少卽棄諸生隱居食力耿介絕俗獨與里人陸舒枝爲詩友王穀伯序其詩云山當具區之浸環堵之室朝雲夕霞前榮垂蘿後戶挂瀑兒荷鋤妻辟繡羹藜飯糗晏如也行之號九巖山人山甫自稱兀然先生父子各有集

列朝詩集邑志行之少工制藝

嘉靖戊子鄉薦以嗜古爲文不馴上公車輒屈寄傲詩歌有鄰人願以己居售開欣然券之給直鄰將徙聞曰毋動第居耳爲焚其券子孟林選隸學宮尋卽棄去一椽數畝自食其力其所往還僅一長洲陸舒枝人多不知孟林卽知而慕者亦無蹤跡知縣傅光宅重其人時過訪山中流連不忍去卒未嘗投足公庭嘗獨坐微吟兀兀若醉自解兀然先生其詩稿較父九巖山人行之爲多

光

福

志

卷六 人物

五

顧謙服字明服崑山文康公之孫因文康賜葬潭山遂從吳籍補學生弱冠才名籍甚累試超羣父履吉亦篤行君子趨庭訓曰如惡惡臭如好好色如是靜中工夫出門如見大賓使民如承大祭是動處工夫佩服無數自號兩如體弱不勝衣言訥訥如不出口而大節自砥端介不回習戴禮十上秋闈見擯需次貢大庭除長洲訓導丁內艱補華亭擢杭之昌化縣清賦賑飢違衆建白能行其意縣接徽界有昱嶺關劇盜嘯聚上官議剿謙服曰無庸也置寨增戍設捕清野可不勤兵而戢又懲禁還刀劃膚盟社及捕僞錦衣以弭激變天啓末璫焰方張一闔奉差黃山道出浙境橫索供億鄰邑承奉恐後謙服按符應付一無所加闔知其廉靜不肆後假道而還臺司交上最績越考遷馬湖府同知不赴居歲餘卒長興昌化鬱有遺思同時請祀名宦鄉邦亦請祀鄉賢平生無一事不合儒行惜爲資格所限入仕晚未獲展其蘊

抱邑志卓行傳

徐麟善飲能引滿百觚醉則於於徐徐行田野間並歌並進業爲儒授徒每百千以貫之家故饒急人之急所授弟子多取高第去子鼎能嗣其業

劉鳳續吳錄

顧山人聖少字季狂吳郡南宮里人少無鄉曲之譽陷於縲絏狂去鄉里年四十始稱詩游燕趙齊魯間客諸王邸中死於閩王元美贈詩云季狂爲諸生避仇中庭走自詫儉類確不操吳音久頗鮮鱗甲腹僅餘雌黃口

潘煉穹窿皮村人家胥湖善治生有隱德喜周卹貧困一日貸村民數金往索其妻頗豔婉辭夫出未歸如是者再煉察其夫未出遠詰之妻曰夫無以償金願以妾事君屢見君不動夫嗔箠者數矣君長者柰何不憐言已泣涕煉驚去不復索後遇夫諭曰汝貧何遽至此更與數金生息養家其人感謝已果舉息倍并償前金時煉有母顧氏年九十將稱觴病劇不能母以子病憂卒煉痛哭不勝亦卒母子並死於慈孝

邑志卓行傳

金朗字元朗讀書潔內行生平交契盡雄俊所至爲臨叩重客而不屑干請

光

福

志

卷六 人物

六

於名公座上每談今古快心事及興廢豪舉之概輒呼可兒進酒語刺刺不休甬東屠龍贈詩云千金綿上能辭賞一箭聊城堪解圍又自述曰男兒七尺貧且死肯向人間重自陳喜爲詩若不經意而雄快慷慨筆墨之外酷似其人客游久之歸不闢一椽惟爲祖父治窆婚二弟人尤多之著有結游於謳二集

劉羽儀字漸于長洲人工詩文性孝友與人交重氣誼素與周忠介公相善忠介以璫禍被逮公與王貞明諸公走訴毛撫一鷺懇雪吏部冤一鷺不聽公大聲直斥其黨閣狀會郡有顏佩章等五人義擊之事人謂公禍且不惻既得知府冠慎力請於毛坐除名弗窮治璫敗得開復崇禎中更科目爲辟舉當道交薦公及部試被擯遂拂袖歸隱於鄧尉之麓講經授徒以老沒門人私謚曰孝惠先生

楊補字無補號古農其先江西人父潤始徙長洲好讀書家貧工詩畫爲人

孝謹重然諾崇禎初游京師館閣諸公皆與訂交後與高濬邢昉金陵顧夢麟游刻意爲清新古淡之學甲申聞變歸於鄧尉南都重建柄國之人多舊游屢趣之出不應與同鄉徐汧最善汧爲馬阮所構甚急補之金陵詣所知楊文驄責以大義遂得解汧將自沈就補謀死所歿後補哭之極哀鬱鬱數年卒年六十子炤字明遠髫歲能詩長爲諸生乙酉後棄去奉親以隱更字潛夫不與人事

徐枋字昭法號俟齋少詹事汧長子少有才名舉崇禎壬午鄉薦南都失守汧將殉國枋日夜號泣欲從死汧曰吾不可以不死若長爲農夫沒世可也乃奉父命拮据營葬遁跡鄧尉山中後隱靈岩之上沙土舍數椽讀書其中布衣艸履終身不入城市家貧常賣畫自給雖藜藿不繼莫能強以一錢之餽平日往來同志數人外雖至戚罕見面時以枋與宣城沈壽民嘉興巢鳴盛爲海內三遺民川湖總督蔡毓榮慕其名具書厚幣託幕友馮羽道意謝

光

福

志

卷六

人物

七

不受遺書馮生略曰僕二十四守先人沒世之言長往避世今已五十一矣親知故舊謝絕往還敢與當世公侯通交接耶且當世之公侯亦安用此衰悴廢民爲哉幸爲我善辭以安我素拜賜多矣惟陽湯斌撫吳尤欽其節嘗屏騶從兩詣山中訪之卒不得見歎息而去著居易堂集二十卷文辭健拔主於扶世教植綱常無一諛墓應酬之作又有廿一史文彙通鑑記事類聚讀史種語雜鈔建元同文錄管見等書山水宗董巨間法倪黃當其得意自謂前無古人書善行草俱爲世所重康熙甲戌年七十三卒弟柯字貫時年十五補諸生父汧殉節後遂杜門不出所居二株園四方賓從宴會有貴公子之風善屬文尤長於詩兼工書法晚號東海一老卒年七十五著有文選人表示兒編一老庵詩文集

文點字與也又號南雲徵明五世孫父秉知名士也明亡隱居竺陽之內舍著書終其身秉三子惟點能繼父志與同邑金侃爲世外侶終老山中詩字

書皆得徵明法時人擬之鄭虔三絕性冲淡不求聞譽亦不過立崖岸生平品詣略見於投贈之作曰高人住深山偶然入城市有如幽谷蘭移置玉堂裡中書顧嗣立詩也龍沈水萬丈鶴立岡千仞神清一段水挹之玉溫潤編修大受詩也朱彝尊尤契重之有題文處士山水詩云去年金侃亡今年文點逝誰脩遺民傳念彼宰相裔又云對此神默傷寸心實悽愴蓋深悼之冀有以傳之也卒年六十六

徐波字元歎幼爲諸生工古文辭有經濟才竟陵鍾惺見而重賞以爲古人復生締交甚厚甲申冬馬士英當國將以清職羅致波知英必敗嘆曰區區新造既無茂宏安石又非孟德仲達何足以羈天下士拂衣竟去歸隱竺陽卜築落木庵以老著述多湮沒僅有謚簫集行世

國朝

黃脩字人闇世居聚塢弱冠補弟子員里中有疑難及大徭役咸咨度焉族

光

福

志

卷六 人物

八

戚故舊貧不自存者每仗助之讀書有得卽筆記之子中堅爲諸生有名後移居郡城屢舉賓興不售遂棄舉子業肆力於古文家雖中落猶舉父時里人所貸千餘金悉還其券卒年七十一著有蓄齋集十六卷

邑志好義傳

惠周惕字元龍居東渚渚南有溪方而窪形如硯故自號硯溪父有聲字律和明季歲貢與徐枋友善以九經教授鄉里周惕少傳家學又從枋及汪琬游究心經學工詩古文詞既壯阨于貧徧歷四方與當代名人交康熙辛未成進士選庶吉士授密雲縣有善政卒于官著有易傳春秋問三禮問詩說及硯溪詩文集子士奇

按府志硯溪先生之子天牧先生已遷城中不復錄

李鍼字含奇家貧能刻苦於學游何焯之門後客燕京遂寄籍盧龍縣康熙辛丑進士入翰林爲文峻潔詩冲淡有韋柳風爲人尚道義與同鄉吳孝廉善孝廉客死都門鍼醵金營棺歛餘十金將爲其扶櫬費留之牀頭在庶吉士方散館前夢官楚中因吟句云瀛洲三載客湘水一帆秋一日謂其同年

邵泰曰吾舍此他往將與吾友別也異時吾必死死而爲神當在楚南及病泰過問之其床頭無一錢而扶吳櫬之十金固封如故後復夢吏胥來迎車馬儀從頗盛有一鍼類移文者請鍼啓鍼先示以期而後行鍼故遲之吏胥屢促未幾卒年垂四十遺一子與女賴泰與同官爲治身後事而後送其櫬與妻子歸光福未幾妻子後先歿歿而降神于永州土穀神祠同年友姜邵湘遂書其句於廟壁有詩數卷刻於山中

孝子趙氏名雲豹字從周吳縣香山人父祖業農從周生而性至孝年八歲母病甚危乃號泣籲天曰願減己壽以活母稽顙流血母病漸愈鄉里咸稱孝焉旣冠篤志問學顧父勞農乃力作稼穡且耕且讀冬夏一短襦泥水蔽擁夜蟲嚙肌有聲寒裂骨弗暫舍於是數年攻苦精研經理每爲一文能闡發聖人體用之旨遠近傳誦受學者衆有木瀆蔡氏者聞名延館于家而從周益自發摠研經覃義終夜不輟主人遺其甘脆必持歸奉親主人知其孝

光

福志

卷六 人物

九

厚益之而弗取也冬夜宿館思親大雪走山谷間墮崖窾自念必死矣卒無恙咸以爲神助也名曰彰而業日進凡有問字來者無不忠告而道鄉黨益以敬服里中兒素無賴暑日裸臥于橋而無敢過者適從周以他事過此其人遽巡走入水中人怪問之曰此趙從周秀才我不敢以無禮見也聞者歎服其感化如此先是從周年二十七妻死或勸之續曰吾有子矣若奉養父母則有吾弟婦在卒不娶其受徒以養親者數十年乾隆初年五十人咸勸之仕曰使吾二親康健常侍鄰下雖枵腹無憾焉至於公卿非所願也竟以諸生終後二年父無疾而終蓋棺時愴呼嘔血死而復蘇母泣曰汝父死汝又死老婦何依乃曰諾強食以慰母心中夜哀毀而鬢髮盡白形如衰老枕席間淚成血斑母不知也晨昏定省如故未期母亦卒從周日夜悲愴遂成痼疾而歿嗚呼非天地不欲孝子垂老於世也所以成其孝也

徐堅字孝先號友竹八歲能應聲屬對徐編脩葆光器重之工書畫喜篆刻

歷游京師臨清諸處所至輒倒屣驚坐繼客楚南依巡撫陸燿燿卒盤桓不忍去護其喪而歸事兩兄若父晚年割田奉其仲家居十年卒年八十餘著有親園詩鈔西京職官印錄行世

程鍾字白山居西積曰逸園妻號生香居士皆能詩

徐增字二遠號衡川靖節廿四世孫生六歲而孤性至孝事母金太君齒躋七十咸以爲養志之驗宅心仁恕好義輕財有以緩急告者輒伙助家計因此漸落生平嗜書手自鈔謄至老不倦繼父志脩族譜建宗祠且謂光福居太湖之濱接壤鄧尉爲吳中勝地由來未有紀載斯爲闕典因編次光福志竈有端緒遽易簣顧謂不肖曰爾能續成此書泉下人亦於茲慰矣卒年七十有一

列女

昔劉向撰列女傳後之作志者皆列列女一門爲風化之勸光福賢貞節烈

光

福

志

卷六

列女

十

代有其人顧澤畔幽芳上達者鮮所以載籍無多俟廣加採訪以慰荼苦茲姑就所知者附錄於人物之後

明須氏善人橋人農家女年十九適陳惠早逝無子土豪顧臣豔其姿欲攘爲妾糾黨百餘入其居強娶翁姑俛首涕泣莫敢誰何氏獨怡然密赴後園自經臣等遍覓揚炬知氏縊於園桑當獲鳴官知縣周爾發痛答擬抵將上其事於巡按具題會爾發調任未果

須氏梅社人少有姿里人豔之會夫李郎死一市兒欲強妻焉氏泣曰吾方送一夫旋迎一夫且利吾夫之死而妻我不猶殺我夫耶乃市兒最犂糾黨聚謀將掠得之氏驚奔母母懼市兒不敢留返於姑姑又懼投姊姊益不敢庇氏泣歸入室自經

徐氏鄧尉山人嬪於李明宇年四十而夫卒無子以從子爲嗣貽產悉歸之持齋縞素終身夫未葬飲食依柩旣葬飲食依主勉勗後人年七十一而卒

國朝

陳氏唐村人圻者袁七妻舅姑早喪生一子甫周七傭作數出比鄰惡少周二輒調之氏正色拒之一日叩門乞火將犯之氏大聲詬呼乃去因趣夫徙居夫曰貧不能徙盍以刀自衛康熙四年正月十一日夜周潛身啓鍵入氏驚起揮刀斫之周憤奪刀還斫氏胸脇數處遂氣絕復斷其首與弟逃至安山橋忽見紅霧四起迷所之爲鄰里所獲置之理斃於獄巡撫韓世琦有從容就義雖死猶生之褒里士曹質募貲立碑建祠以節婦高氏等十人配享陸氏鳳村鄉民張茂禧妻年廿七夫歿遺二子舅姑且耄氏日夕捫屨漚菅以佐薪水雖雪夜必篝燈以作十指俱裂舅姑相繼死於疫氏罄鬻衣裳以爲殯遂得寒疾患咳終身復積寸累銖葬其舅姑與夫而卒年五十有七雍正十年題旌

光

福

志

卷六

列女

十一

